

კოდიფიცირებული

შეტანილია ცვლილება: (09.02.2011 #23/2)

დამტკიცებულია:

(27.12.2013 #23/8)

თსსუ-ის წარმომადგენლობითი საბჭოს

(27.04.2015 #23/6)

2009 წლის 14 იანვრის N23/1 დადგენილებით

(26.02.2016 #23/2)

(06.07.2016, N23/6)

(22.12.2016 N23/11)

(23.07.2018 N23/10)

(23.10.2019 N23/11)

(26.11.2019 N23/12)

საჯარო სამართლის იურიდიული პირის - თბილისის სახელმწიფო სამედიცინო
უნივერსიტეტის პირველი საუნივერსიტეტო კლინიკის

დებულება

(26.02.2016 N23/2)

მუხლი 1. ზოგადი დებულებები

1. საჯარო სამართლის იურიდიული პირის - თბილისის სახელმწიფო სამედიცინო უნივერსიტეტის პირველი საუნივერსიტეტო კლინიკა (შემდგომში - „კლინიკა“) შექმნილია „უმაღლესი განათლების შესახებ, „საექიმო საქმიანობის შესახებ“ საქართველოს კანონის, „საქართველოს სამოქალაქო კოდექსის“ და სხვა ნორმატიული აქტების მოთხოვნების შესაბამისად. (26.02.2016 N23/2)

2. სამართლებრივი მდგომარეობით და უფლება-მოვალეობებით კლინიკა უთანაბრდება იურიდიული პირის ფილიალებისათვის განსაზღვრულ სტატუსს, რომელიც ფუნქციონირებს საგადასახადო ორგანოებში სახელმწიფო რეგისტრაციის გარეშე.

3. კლინიკა საქმიანობისას ძირითადად ხელმძღვანელობს საქართველოს კონსტიტუციით, საერთაშორისო ხელშეკრულებებითა და შეთანხმებებით, საქართველოს საკანონმდებლო და კანონქვემდებარე ნორმატიული აქტებით, მათ შორის თსსუ-ს წესდებით, კომპეტენციის შესაბამისად თსსუ-ს მართვის ორგანოების გადაწყვეტილებებითა და წინამდებარე დებულებით.

4. კლინიკას აქვს დადგენილი წესით დამტკიცებული რეკვიზიტებით სარგებლობის უფლება. კლინიკის ფუნქციონირებისათვის გადაცემული ქონებით, მათ შორის ფინანსური სახსრებით სარგებლობას და განკარგვას კლინიკა ახორციელებს ამ დებულებით დადგენილი წესით. ფინანსური სახსრების აკუმულირებისათვის კლინიკას გააჩნია უნივერსიტეტის ქვეანგარიში და შესაბამისი სალარო.

5. კლინიკის ადმინისტრაციის მისამართია: ქ. თბილისი, გუდამაყრის ქ. N4. (27.12.2013 N23/8)

მუხლი 2. კლინიკის ძირითადი მიზანი და ფუნქციები

1. კლინიკის ძირითადი მიზანია დიპლომამდელი (საბაზო) და დიპლომისშემდგომი (რეზიდენტურა, რეზიდენტურის ალტერნატიული ფორმა) და უწყვეტი პროფესიული განვითარებისა (პროფესიული მზადებისა და სამედიცინო პერსონალის კვალიფიკაციის ამაღლება) პროგრამების განხორციელებისათვის კლინიკური ბაზით უზრუნველყოფა, ქვეყანაში აღიარებული სამედიცინო მომსახურების პროფესიულ და ეთიკურ სტანდარტებთან შესაბამისი სამედიცინო საქმიანობა

2. კლინიკის საქმიანობის ძირითადი მიმართულებებია:

ა) დიპლომამდელი და დიპლომის შემდგომი (რეზიდენტურა) პროფესიული მზადების (კლინიკური დისციპლინების სწავლება) განხორციელება თანამედროვე მოთხოვნების შესაბამისად;

ბ) უწყვეტი პროფესიული განვითარება: უწყვეტი სამედიცინო განათლების პროფესიული რეაბილიტაცია და სხვა შესაბამისი პროგრამების, ციკლებისა და ტრენინგების განხორციელება;

გ) ქვეყანაში აღიარებული სამედიცინო მომსახურების პროფესიულ და ეთიკურ სტანდარტებთან შესაბამისი სამედიცინო საქმიანობა;

დ) სასწავლო-მეთოდოლოგიური და სამეცნიერო-კვლევითი სამუშაოების წარმოება.

ე) დადგენილი წესით ახალი სამკურნალო საშუალებების და სამკურნალო ტექნოლოგიების აპრობაცია და დანერგვა.

ვ) სამედიცინო პერსონალის კვალიფიკაციის ამაღლება.

3. წინამდებარე დებულებით განსაზღვრული საქმიანობის განხორციელებისას კლინიკას უფლება აქვს საკუთარი ინიციატივით და/ან თბილისის სახელმწიფო სამედიცინო უნივერსიტეტთან (შემდგომში თსსუ) შეთანხმებით მიიღოს გადაწყვეტილებები. რომლებიც არ ეწინააღმდეგება კანონმდებლობას და ამ დებულებას.

4. კლინიკა უფლებამოსილია:

ა) დადგენილი წესით განახორციელოს ყველა აუცილებელი ქმედება, რომელიც დაკავშირებული იქნება დებულებით გათვალისწინებული ფუნქციებისა და ამოცანების შესრულებასთან, თსსუ-ს დავალებებთან და გაფორმებულ ხელშეკრულებებთან.

ბ) უნივერსიტეტის მიერ დადგენილ ფარგლებში საკუთარი სახელით დადოს ცალკეულ ფიზიკურ თუ იურიდიულ პირებთან სათანადო ხელშეკრულებები (კონტრაქტები) სამუშაოების (მომსახურების) ჩატარებაზე. მოახდინოს მათ მიერ შესრულებული სამუშაოს (მომსახურების) ანაზღაურება;

გ) თსსუ-სთან შეთანხმებით შექმნას ფონდები და კომისიები (მათ შორის ეთიკისა და სამედიცინო სტანდარტების კომისია).

5. კლინიკა ადგენს და ამტკიცებს სამედიცინო სტანდარტებს კლინიკის მიერ განსახორციელებელი სამედიცინო მომსახურების სფეროების მიხედვით.

6. კლინიკა ვალდებულია ოპერატიულად მიაწოდოს თსსუ-ს მართვის ორგანოებს მოთხოვნილი ინფორმაცია ცალკეული სამუშაოების შესრულების მდგომარეობის თაობაზე.

7. წინამდებარე დებულებით განსაზღვრული საქმიანობის განხორციელებისას კლინიკას უფლება აქვს საკუთარი ინიციატივით და/ან თსსუ-თან შეთანხმებით მიიღოს გადაწყვეტილებები, რომლებიც არ ეწინააღმდეგება კანონმდებლობას და ამ დებულებას.

მუხლი 3. კლინიკის ხელმძღვანელობა

1. კლინიკას ხელმძღვანელობს კლინიკის გენერალური დირექტორი (შემდგომში დირექტორი), რომელსაც თანამდებობაზე ნიშნავს და ათავისუფლებს სსიპ თბილისის სახელმწიფო სამედიცინო უნივერსიტეტის რექტორი (შემდგომში - რექტორი). (9.02.2011 N23/2)

2. კლინიკის გენერალურ დირექტორად შეიძლება დაინიშნოს უმაღლესი განათლების მქონე პირი, რომელსაც აქვს არანაკლებ 5 (ხუთი) წლიანი მუშაობის გამოცდილება ხელმძღვანელ თანამდებობაზე. (23.07.2018 N23/10)

2¹. კლინიკის გენერალურ დირექტორს ჰყავს მოადგილე, რომელსაც თანამდებობაზე ნიშნავს და ათავისუფლებს უნივერსიტეტის რექტორი, კლინიკის გენერალური დირექტორის წარდგინებით. (23.10.2019 N23/11).

3. კლინიკას ჰყავს კლინიკური დირექტორი, რომელსაც თანამდებობაზე ნიშნავს და ათავისუფლებს უნივერსიტეტის რექტორი, კლინიკის გენერალური დირექტორის წარდგინებით. (23.10.2019 N23/11).

4. გენერალური დირექტორის არყოფნის შემთხვევაში დირექტორის მოვალეობას ასრულებს კლინიკური ან ფინანსური დირექტორი (23.10.2019 N23/11).

4¹ ამოღებულია (26.11.2019 N23/12).

5. კლინიკური დირექტორის უფლებამოსილება განისაზღვრება დებულებით. (27.12.2013 N23/8).

6. კლინიკას ჰყავს ფინანსური დირექტორი, რომელსაც კანცლერის წარდგინებით თანამდებობაზე ნიშნავს რექტორი და მისი უფლებამოსილება განისაზღვრება დებულებით. (06.07.2016, N23/6).

მუხლი 4. კლინიკის გენერალური დირექტორი

(9.02.2011 N23/2)

1. კლინიკის გენერალური დირექტორი: (9.02.2011 N23/2)

ა) განსაზღვრავს კლინიკის სტრუქტურას, საშტატო განრიგს და

განსახილველად და დასამტკიცებლად წარუდგენს თსსუ-ის წარმომადგენლობით

საბჭოს; (22.12.2016 N23/11)

ბ) პასუხისმგებელია საქართველოს ნორმატიული აქტების, თსსუ მართვის ორგანოების გადაწყვეტილებების და დავალებების შესრულებისათვის იმ სფეროში, რომელიც კლინიკის საქმიანობას ეხება;

ბ1) ახორციელებს კლინიკის ადმინისტრაციული, ეკონომიკური, ფინანსური და სამეურნეო საქმიანობის ოპერატიულ მართვას; (27.12.2013 N23/8)

გ) წარმოადგენს კლინიკას მინდობილობის გარეშე;

დ) სამუშაოს შესასრულებლად ფიზიკურ და იურიდიულ პირებთან დამოუკიდებლად დებს ხელშეკრულებებს, რომელთა ღირებულებაც არ აღემატება თსსუ-ს მიერ დადგენილ ოდენობას;

დ1) დებს ხელშეკრულებებს კლინიკის სატენდერო კომისიის მიერ გამოცხადებული ტენდერით შერჩეულ მიმწოდებელთან; (27.04.15 N23/6)

ე) სამუშაოდ იღებს და ათავისუფლებს მუშაკებს (გარდა ამ დებულებით განსაზღვრული პირებისა). წყვეტს თანამშრომლების წახალისებასა და დისციპლინარული პასუხისმგებლობის საკითხებს;

ე1). ადგენს წლიურ საფინანსო-ეკონომიკურ ანგარიშებს, კლინიკის განვითარების ბიზნეს-გეგმას და წარუდგენს თსსუ-ს; (27.12.2013 N23/8)

ვ) შეიმუშავებს კლინიკის წლიურ ხარჯთაღრიცხვას, საფინანსო გეგმას, შრომის ანაზღაურების, პრემიების ფორმებსა და სისტემებს. შვებულების მიცემის წესს და მის ხანგრძლივობას;

ზ) ამტკიცებს კლინიკის შინაგანაწესს;

თ) ამტკიცებს სამედიცინო სტანდარტებს;

თ1) ამტკიცებს პროექტებს სამედიცინო მომსახურების ტარიფების შესახებ. (27.12.2013 N23/8)

ი) ანაწილებს მოვალეობებს კლინიკის თანამშრომლებს შორის, აძლევს მათ შესასრულებლად სავალდებულო მითითებებს და დავალებებს, აკონტროლებს თანამშრომელთა მიერ სამსახურებრივი მოვალეობების შესრულებას;

კ) კლინიკის დებულებით განსაზღვრული ფუნქციების განხორციელების მიზნით, თსსუ-ს მიერ დადგენილ ფარგლებში ახორციელებს კლინიკის ფინანსური სახსრებისა და სხვა მატერიალური ქონების მართვას და პასუხისმგებელია მის სწორ გამოყენებასა და მოვლა-პატრონობაზე;

ლ) კომპეტენციის ფარგლებში დამოუკიდებლად წყვეტს კლინიკის საქმიანობასთან დაკავშირებულ ყველა სხვა საკითხს;

2. კლინიკის საფინანსო გეგმა კლინიკის გენერალური დირექტორის წარდგინებით მტკიცდება თსსუ-ის კანცლერის მიერ. (9.02.2011 N23/2)

3. კლინიკის გენერალური დირექტორი ანგარიშვალდებულია რექტორისა და კანცლერის წინაშე მართვის ამ ორგანოთა კომპეტენციის გათვალისწინებით. (9.02.2011 N23/2)

მუხლი 4¹. კლინიკური დირექტორის უფლებამოსილებანი

1. კლინიკური დირექტორი:

ა) ხელმძღვანელობს და კოორდინაციას უწევს კლინიკის მიმართულებების სასწრაფო გადაუდებელ და გეგმიურ სამკურნალო-დიაგნოსტიკურ საქმიანობას;

ბ) მიმართულების ხელმძღვანელებთან ერთად კონტროლს უწევს კლინიკის სასწრაფო გადაუდებელ და გეგმიურ სამკურნალო - დიაგნოსტიკური საქმიანობის მკურნალობის ხარისხს;

გ) კოორდინაციას აკეთებს და მიმართულების ხელმძღვანელებთან ერთად ხელს უწყობს ახალი სამკურნალო საშუალების და სამკურნალო ტექნოლოგიების აპრობაციას და დანერგვას კლინიკაში;

დ) ხელმძღვანელობს და კოორდინაციას უწევს მიმართულების ხელმძღვანელებთან ერთად კლინიკაში პოსტდიპლომური (რეზიდენტურის, უწყვეტი პროფესიული განვითარების და სხვა.) პროგრამების განხორციელებას;

ე) უფლებამოსილია დააყენოს წინადადებები კლინიკის ადმინისტრაციის წინაშე შესაბამისი კლინიკის მიმართულების ხელმძღვანელის წარდგინებით ან მის გარეშე თანამშრომელთა წახალისების ან მათზე დისციპლინარული ზემოქმედების თაობაზე შრომითი დისციპლინის ან საექიმო ეთიკის დარღვევის შემთხვევაში;

ვ) კლინიკის მიმართულების ხელმძღვანელის წარდგინებით ან მის გარეშე შეუძლია კლინიკის და უნივერსიტეტის ხელმძღვანელობის წინაშე დააყენოს საკითხი ახალი, პერსპექტიული თანამშრომლის მიღების თაობაზე;

ზ) უფლებამოსილია მოსთხოვოს მიმართულების ხელმძღვანელს კლინიკის სამკურნალო-დიაგნოსტიკური საქმიანობის შესახებ ანგარიში.

(9.02.2011 N23/2)

მუხლი 4². ამოღებულია (27.12.2013 N23/8)

მუხლი 4³. კლინიკის ფინანსური დირექტორის უფლებამოსილებანი (06.07.2016, N23/6)

1. ფინანსური დირექტორი:

ა) ხელმძღვანელობს საყოველთაო ჯანმრთელობის დაცვის სახელმწიფო პროგრამასა და სხვა სადაზღვევო კომპანიებთან კოორდინაციის ჯგუფს, საფინანსო - ეკონომიკურ, აღრიცხვა - ანგარიშგებისა და შესყიდვების სამსახურებს;

ბ) თბილისის სახელმწიფო სამედიცინო უნივერსიტეტის მომსახურე აუდიტორული კომპანიის მიერ კლინიკაში მივლინებულ აუდიტორთან კონსულტაციების საფუძველზე, ახორციელებს ფინანსური ოპერაციების მონიტორინგს, უზრუნველყოფს აღნიშნული ოპერაციების კანონმდებლობასთან შესაბამისობას;

გ) ხელმძღვანელობს კლინიკის ბიუჯეტის დაგეგმვას;

დ) მონიტორინგს უწევს, მიმდინარე ფინანსური ტრანზაქციების განხორციელების პროცედურებს დადგენილი წესის შესაბამისად;

ე) უზრუნველყოფს ფინანსური ანგარიშების (თვიური, კვარტალური, წლიური, საბოლოო) წარმოებას;

ვ) კოორდინაციას უწევს მის დაქვემდებარებაში მყოფი სამსახურების მიერ ზემდგომი სტრუქტურული ერთეულებისთვის კლინიკის ფინანსური საქმიანობის შესახებ სწორი და სრულყოფილი ინფორმაციის ხელმისაწვდომობას;

ზ) საკუთარი უფლებამოსილების ფარგლებში ახორციელებს კლინიკის ფინანსური ინტერესების წარდგენას მესამე პირებთან ურთიერთობისას;

თ) კლინიკის ფინანსური ინტერესებიდან გამომდინარე, ახორციელებს სხვა საქმიანობას.

(06.07.2016, N23/6)

მუხლი 5. კლინიკის აპარატი, მისი სტრუქტურული ერთეულების ხელმძღვანელობა და დამხმარე პერსონალი

1. კლინიკის საქმიანობა ხორციელდება კლინიკის გენერალური დირექტორის მიერ კლინიკის თანამშრომლებთან დადებული ინდივიდუალური შრომითი ხელშეკრულების (კონტრაქტის) საფუძველზე. (9.02.2011 N23/2)

2. კლინიკის პერსონალის მიღება - გათავისუფლებას და მათთან შრომითი ხელშეკრულების (კონტრაქტის) გაფორმების საკითხს დამტკიცებული გეგმის ფარგლებში უშუალოდ წყვეტს კლინიკის გენერალური დირექტორი. (9.02.2011 N23/2)

3. შრომითი ხელშეკრულებები უნდა ითვალისწინებდეს შრომითი და სამოქალაქო კანონმდებლობის მოქმედ ნორმებს.

4. კლინიკაში შემავალ სტრუქტურულ ქვედანაყოფებს ხელმძღვანელობს შესაბამისი სტრუქტურული ქვედანაყოფის ხელმძღვანელი, რომელსაც რექტორთან შეთანხმებით თანამდებობაზე ნიშნავს და თანამდებობიდან ათავისუფლებს კლინიკის გენერალური დირექტორი. (9.02.2011 N23/2)

5. კლინიკის სტრუქტურული ქვედანაყოფის ხელმძღვანელი ანგარიშვალდებულია კლინიკის გენერალური დირექტორის წინაშე. (9.02.2011 N23/2)

6. კლინიკის სტრუქტურული ქვედანაყოფის საქმიანობის წესი რეგულირდება კლინიკის გენერალური დირექტორის მიერ დამტკიცებული დებულების შესაბამისად. (9.02.2011 N23/2)

მუხლი 6. კლინიკის ქონება

1. კლინიკის ქონება წარმოადგენს თსსუ-ს საკუთრებას და კლინიკას იგი გადაცემული აქვს სარგებლობის უფლებით.

2. კლინიკის ქონებრივი და ფინანსური უფლება-მოვალეობების განსაზღვრისას მხედველობაში მიიღება მოქმედი კანონმდებლობით ფილიალისათვის დადგენილი სტატუსი, სავალდებულო სახელმწიფო რეგისტრაციის გარეშე.

3. კლინიკის ქონებასა და შემოსავლებთან დაკავშირებული საკითხები კლინიკასა და თსსუ-ს შორის რეგულირდება მოქმედი კანონმდებლობისა და ამ დებულების შესაბამისად.

მუხლი 7. კლინიკის ეკონომიკური საქმიანობა

1. კლინიკა ეკონომიკურ საქმიანობას ახორციელებს:

ა) საკუთარი სახელით, თსსუ-ს მიერ დადგენილ ფარგლებში ან
ბ) თსსუ-ს მინდობილობით, სახელშეკრულებო საწყისებზე სათანადო ანაზღაურების პირობებში;

2. ეკონომიკურ საქმიანობას კლინიკა ახორციელებს წინამდებარე დებულების, მოქმედი კანონმდებლობის და სხვა ნორმატიული აქტებიდან გამომდინარე. შემსყიდველებთან (დამკვეთებთან) დადებული ხელშეკრულებების საფუძველზე, ან თსსუ-ს და შესაბამისი ორგანოების დავალებების საფუძველზე.

3. შესრულებული სამუშაოების, გაწეული მომსახურების ფასებსა და ტარიფებს, ბაზრის კონიუქტურიდან გამომდინარე, კლინიკა ადგენს მოქმედი კანონმდებლობით განსაზღვრული წესით.

4. ფასები და ტარიფები, რომელიც რეგულირდება სახელმწიფო თუ ადგილობრივი თვითმმართველობის ორგანოების მიერ, სავალდებულოა კლინიკისათვის. კლინიკის მიერ გასაწევი ცალკეული მომსახურების ტარიფები შეიძლება დადგინდეს თსსუ-ს მიერ.

5. მიმდინარე ეკონომიკური საქმიანობისათვის საჭირო მატერიალურ-ტექნიკური უზრუნველყოფის საკითხებს კლინიკა წყვეტს დამოუკიდებლად, თუ სხვა რამ არ იქნება წინასწარ განსაზღვრული თსსუ-ს მიერ.

6. კლინიკა თსსუ-სთან შეთანხმებით განსაზღვრავს სოციალურ-ეკონომიკური განვითარების წლიურ და პერსპექტიულ გეგმებს.

მუხლი 8. წლიური შედეგები

1. წლიური შედეგები აისახება კლინიკის ბალანსში, თსსუ-ს ნაერთ ბალანსში და საბუღალტრო ანგარიშებში.

2. კლინიკის წლიურ ბალანსს ამტკიცებს თსსუ.

3. კლინიკის ფონდების ჩამონათვალს, მათი შევსებისა და გამოყენების წესს განსაზღვრავს კლინიკის ადმინისტრაცია და ამტკიცებს თსსუ.

მუხლი 9. აღრიცხვა და ანგარიშგება

1. საბუღალტრო და სტატისტიკურ აღრიცხვას კლინიკა ახორციელებს მოქმედი კანონმდებლობით გათვალისწინებული მოცულობითა და პერიოდულობით.
2. სამეურნეო წელი ემთხვევა კალენდარულ წელს და გრძელდება 1-ლი იანვრიდან 31 დეკემბრის ჩათვლით.

მუხლი 10. კლინიკის საქმიანობის კონტროლი

1. კლინიკის საქმიანობის კონტროლი ხორციელდება თსსუ-ს მართვის შესაბამისი ორგანოების მიერ.
2. საჭიროების შემთხვევაში თსსუ ნიშნავს აუდიტორს.
3. კლინიკის საქმიანობა მოწმდება არსებული კანონმდებლობით დადგენილი წესით.

მუხლი 11. პასუხისმგებლობა და დავის გადაწყვეტა

1. კლინიკა პასუხისმგებელია თავის ვალდებულებებზე.
2. დავა კლინიკასა და მის მუშაკს შორის წყდება მოქმედი შრომისა და სამოქალაქო კანონმდებლობის საფუძველზე.
3. კლინიკის გენერალური დირექტორისა და კლინიკის მუშაკების პასუხისმგებლობა განისაზღვრება მოქმედი კანონმდებლობის შესაბამისად. (9.02.2011 N23/2)

მუხლი 12. კლინიკის საქმიანობის შეწყვეტა

1. კლინიკის საქმიანობის შეწყვეტის საფუძველებია:
 - ა) რეორგანიზაცია;
 - ბ) ლიკვიდაცია.
2. კლინიკის ლიკვიდაცია ხორციელდება კანონმდებლობით დადგენილი წესით.

მუხლი 13. დასკვნითი დებულებები

კლინიკის დებულების გაუქმება, მასში ცვლილებებისა და დამატებების შეტანა ხდება უნივერსიტეტის წარმომადგენლობითი საბჭოს გადაწყვეტილებით, კანონმდებლობით დადგენილი წესით.